

Geistlicher Baustein Nr. 19

- Gott heilt! -

Albanische Übersetzung :

Guri i Ndertimit Frymor Nr.19

- PERËNDIA SHËRON ! -

Eksodi 15:26: "... sepse Unë jam Zoti që të shëron."

Kur i dëgjuam këto këngë të bukura, vëllai Branham po fliste në një mbledhje (Shërbesë) në Feniks, dhe i thashë vëllait Outlaw: "Gëzohem që po regjistrohen, sepse dua t'i dëgjoj përsëri. Më pëlqen t'i dëgjoj këto këngë dhe vendos kasetën, i dëgjoj kur kam mundësi."

Nuk ka gjë më të mirë se muzika. E dini? Perëndia shëron përmes muzikës. A e dinit këtë? Perëndia shëron përmes muzikës.

Perëndia shëron përmes dashurisë. Perëndia shëron përmes mjekësisë. Perëndia shëron përmes lutjes. Perëndia ka shumë mënyra për të shëruar. Varet se cila mënyrë të nevojitet.

Nganjëherë pak dashuri që shprehet, shëron një plagë të vjetër, një vend të vjetër ku ka pasur një mlllef apo ndonjë gjë tjetër. Do ta shërojë atë vend, vetëm pak dashuri, një kujdes i vogël që tregohet.

Nganjëherë kur ndihesh i rrënuar dhe ndodhesh thellë në baltë, atëherë vendos njërën nga ato kaseta, atë muzikë apo ndonjë regjistrim dhe lëre të luajë. Dhe menjëherë, e sheh veten duke tundur këmbën ose dorën, dhe gjithçka kalon. Pastaj je përsëri në këmbë, i gatshëm për të vazhduar përpara.

[1] Tani, Perëndia shëron në shumë mënyra (1 Pjetrit 2:24-25). Një mjek më pyeti së fundmi: "Çfarë mendimi ke për mjekësinë, vëlla Branham?"

I thashë: "Epo, Perëndia është i vetmi që mund të shërojë, zotëri. Bibla nuk gabon, dhe në Bibël thuhet: 'Unë jam Zoti që i shëron të gjitha sëmundjet e tua.'" (Psalmi 103:1-3). Dhe i thashë: "Bibla nuk mund të gënjejë. Perëndia shëron përmes mjekësisë. Perëndia shëron përmes dashurisë. Perëndia shëron përmes mirëkuptimit. Perëndia shëron përmes kujdesit. Perëndia shëron përmes lutjes. Perëndia shëron përmes mrekullive. Në përmbledhje, mund të themi: Perëndia shëron. Kjo është gjithçka që ka të bëjë me këtë – Ai është Shëruesi."

Ne nuk kemi ndonjë ilaç që mund të krijojë, për shembull, një qelizë në dorën tënde për ta shëruar; apo në trupin tënd për ta shëruar. Mund të të heqim një dhëmb, mund të të presim apandedit ose të të nxjerrim fshikëzën e tëmthit, por kush shëron? Perëndia. Asnjë ilaç nuk formon qeliza – vetëm Perëndia. Jeta formon qeliza. Perëndia është i vetmi Shërues – dhe për këtë kemi folur.

[2]

Shpresoj që secili prej jush ta kuptojë këtë, veçanërisht ata që dëshirojnë të luten për vete, ata që ndihen aq keq, ndoshta me probleme që mjekët nuk mund t'i prekin.

Dhe ne besojmë se mjekët i ndihmojnë njerëzit. Unë besoj se Perëndia shëron përmes mjekësisë. Perëndia shëron përmes operacionit. Perëndia shëron përmes mirëkuptimit. Perëndia shëron përmes dashurisë. Vetëm pak dashuri shkon larg. Kur ndokush është i shqetësuar dhe ti i tregon atij se të interesojnë hallet e tij, shihni, Perëndia shëron përmes dashurisë. Perëndia shëron përmes lutjes. Perëndia shëron përmes mrekullive. Perëndia shëron përmes Fjalës së Tij (Psalmi 107:20). Perëndia shëron! Cilado qoftë mënyra, është Perëndia Ai që shëron, sepse Ai tha: “Unë jam Zoti që i shëron të gjitha sëmundjet e tua.” Kështu që të gjitha këto duhet të punojnë së bashku, dhe burrat në shërbime të ndryshme duhet të bashkëpunojnë për këtë. E kuptoni? Por ata nuk e bëjnë, sepse ndonjëherë u ndalohet të marrin një qëndrim të caktuar ndaj Fjalës së Perëndisë, për shkak të denominacionit të tyre që nuk ua lejon. Por kjo nuk e ndal të vërtetën; ajo mbetet gjithmonë po ajo: Perëndia do të vazhdojë të shërojë në të njëjtën mënyrë. (3)

„Ne pamë një burrë që mundi të thërrasë një të vdekur nga varri, që mundi të bëjë të gjitha këto mrekulli të mrekullueshme, dhe pastaj e pamë Atë të varur në kryq me pështymë në fytyrë, ku ushtarët ia kishin shkukur mjekrën dhe e kishin pështyrë në fytyrë, dhe e pamë me shpinën e tij të rrahur me 39 goditje...” (Isaia 53:4-5). Ata nuk mund t'i jepnin 40. Dhe a e dinit se sot në botë ka 39 sëmundje kryesore? 39 goditje mbi shpinën e Tij me një kamxhik prej lëkure me toptha plumbi në skajet e tij. E rrahën derisa brinjët iu dukeshin; “Të gjitha eshtrat e Mia janë çjerrë (zhvendosur)”, tha Ai në Psalmin 22:10-18. (4)

Kur ne shohim se si Perëndia e shëron një njeri... Para disa ditësh, një vajzë e vogël u soll në kishën tonë mbi një vig (mbajtse). Dhe më thirrën natën, ndërsa isha ende rrugës, dhe më thanë: “Vajza nuk do të mbijetojë”, kanceri ishte shumë i rëndë. Ajo ishte rreth 17 vjeç... “Ajo nuk mund të arrijë as atje. Do të vdesë para se të arrijë.” Ishte një rast i trishtueshëm, një fëmijë i dashur, vetëm 17 vjeç.

Për t'i treguar diçka kishës sime, nuk e preka fare fëmijën. Hyra brenda. Ajo qëndronte mbi një vig... Natyrisht, kishte edhe njerëz të tjerë të sëmurë atje, por unë isha i përqendruar te ajo fëmijë, për të kapur Frymen e saj, ndërsa flisja me të. Ajo dukej një vajzë e mirë dhe e dashur. Nuk pashë asnjë arsye pse ky fëmijë duhej të mbushte një varr para kohe.

Kështu që ky duhej të ishte djalli, që po përpiquej t'i merrte jetën. Prandaj unë nuk e preka aspak fëmijën, por shkova drejt e te podiumi me Fjalën dhe qëndrova vetëm te Fjala. Dhe Fjala e shëroi atë aq menjëherë, sa ajo u ngrit dhe doli jashtë. Tani është e shëndoshë, jeton si çdo njeri tjetër, pa as edhe një gjurmë të asaj që kishte. Nuk e kam prekur as edhe një herë.

Shikoni, Fjala doli përpara dhe ajo e besoi Fjalën, dhe Fjala është jeta e Perëndisë dhe fuqia e Perëndisë. Dhe është Fjala ajo që e bën veprën. Fjala e shëron të sëmurin (Marku 7:24-30; Mateu 8:5-13). (5)

Një mbrëmje isha shumë i befasuar. Një grua e vogël erdhi në podium, në atë ndërtesë të madhe prej treqind mijë dollarësh, dhe kishte pak grim në fytyrë. Ajo qëndroi aty dhe filloi të dridhej. Unë i thashë përmes Frymës së Shenjtë: "Ju jeni luterane." Ajo tha: "Po." Dhe unë i thashë: "Ju keni ardhur që të lutem për ju. Dhe arsyeja pse ecni ashtu, është se të dy gjunjët tuaj kanë qenë të thyer. Kjo ka ndodhur nga një aksident automobilistik që keni pasur para katër vitesh." Ajo tha: "Kjo është e vërtetë." Unë i thashë: "Mjeku juaj është një burrë i vogël, i hollë, tullac dhe me syze." Ajo tha: "Ashtu është." Dhe unë i thashë: "Ai po ju trajton, sepse kocka në gju është bërë tuberkuloze dhe mishi përreth është kalbur." Ajo tha: "Ashtu është." Dhe më pyeti: "A ka shpresë për mua?" Unë i thashë: "Kjo varet nga mënyra se si i afroheni Zotit Jezus." Ajo pyeti: "A mund të më ndihmoni?" Unë i thashë: "Jo, zonjë. Askush nuk mund t'ju ndihmojë tani, por ju vetë duhet t'i hapni rrugën bekimit që Zoti ka për ju." Dhe ajo tha: "Unë tani besoj me gjithë zemër." Unë i thashë: "Zoti të ka shëruar, motër; Kështu është THOT ZOTI, ti je e shëruar."

Ajo tha: "Z. Branham, unë nuk kam mundur të gjunjëzohem", tha ajo, "për katër vjet", ndërsa qante, qëndronte aty dhe i dridheshin duart. Dhe një turmë e madhe luteranësh dhe presbiterianësh e shikonin. Dhe unë i thashë: "Pse nuk shkoni poshtë te altari dhe të gjunjëzoheni?" Ajo tha: "Më lini të gjunjëzohem këtu, pikërisht aty ku u shërova." Ajo nuk u zhvendos fare nga vendi, por e dinte se ishte shëruar. Diçka kishte ndodhur.

Shikoni, ajo e dinte. Nuk kishte më dyshim për këtë (Hebrenjve 11:1-2).

Unë i thashë: "Bjer në gjunjë." Dhe për herë të parë pas katër vitesh, me të dy gjunjët e thyera dhe pa ndjeshmëri në to, kjo grua u gjunjëzua si një vajzë e re; lotët i rridhnin nëpër faqe, ajo ngriti duart drejt Perëndisë dhe u ngrit aq lehtë sa një vajzë e vogël dhe kërcëu nga podiumi. Çfarë ishte kjo? Perëndia kishte bërë një rrugë për këtë. Tani, Ai ka dërguar mjekë. Kjo është e vërtetë. Dhe mjekët janë të mirë. Ata kanë bërë gjithçka që kanë mundur, por Perëndia përgatiti një rrugë. Kjo është e gjitha. Shikoni, pasi mjeku dështoi në rrugën e tij, rruga e Perëndisë është shumë më e lartë se rruga jonë (Isaia 55:8-9). Sa e mrekullueshme! [6]

Këtu janë vëllai Sidney Jackson dhe motra Jackson nga Afrika e Jugut. Ai mund të ngrihet këtu, të marrë këtë temë dhe t'ju tregojë me të vërtetë disa gjëra se si është atje. Por sigurisht, njerëzit shkojnë te idhujt dhe shërohen. Shikoni, pse ndodh kjo?

Ashtu si kur Dr. Aegery më kritikoi atëherë, sepse unë thashë që djalli nuk mund të shërojë. Ai tha: "Një njeri që flet para kaq shumë njerëzve si ju dhe mbron një teologji kaq të mjerë, duke thënë se djalli nuk mund të shërojë." Ai tha: "Ne kemi një grua afër nesh, që mban një përparëse rreth vetes, dhe ajo shkon përreth dhe njerëzit vijnë tek ajo dhe duhet të hedhin para në atë përparëse; pastaj ajo i fërkon ato, merr flokë nga koka e saj dhe gjak nga venat e saj, i vendos mbi një fije floku dhe e hedh prapa shpine. Dhe nëse ajo detyrohet të kthejë kokën dhe të shikojë prapa, sëmundja u kthehet atyre njerëzve. Por 30 përqind shërohen. Dhe pastaj ju thoni që djalli nuk mund të shërojë?" Dhe unë mendova: "Oh, oh," dhe i shkrova atij: "I nderuar zotëri, më duket e çuditshme që një dekan i një kolegji luteran e mbështet teologjinë e tij mbi një përvojë, në vend që mbi Fjalën e Perëndisë." A shihni? Fjala e Perëndisë thotë se Satani nuk mund të dëbojë Satanin (Mateu 12:22-30). Kjo e mbyll çështjen; Jezusi e tha. Ju çuditëni se si këta njerëz shërohen përmes kësaj magjistareje, por kjo ndodh sepse vetë njerëzit mendojnë se po i afrohen Perëndisë përmes asaj magjistareje. Dhe shërimi bazohet në besim, jo në atë se sa i drejtë je, sa i mirë je, sa i zbaton urdhërimet ose çfarëdo tjetër. Është i bazuar vetëm në besim. Çdo gjë është e mundur për atë që beson. Nuk varet nga sa i mirë je. Kam parë prostituta që vijnë në podium dhe shërohen menjëherë, dhe një grua e shenjtë kalon mbi podium dhe nuk e merr. Sigurisht, është e bazuar në besim – nëse mund ta besosh – jo në drejtësi."

Shikoni atje në Francë, ku njerëzit shkojnë tek ajo falltore te asaj gruaje. Ata shkojnë atje me karroca dhe kthehen duke ecur. Dhe kjo nuk është asgjë tjetër përveçse supersticion i pastër, Spiritizëm, sepse ata adhurojnë një person të vdekur. Shihni, dhe megjithatë ata shërohen, sepse mendojnë se po i afrohen Perëndisë. Tani, jo se dua të nënçmoj njerëzit katolikë – është fjala për sistemin katolik, njësoj siç jam kundër sistemit protestant – të gjitha këto gjëra.

Tani, predikues, e di që kjo do t'ju shqetësojë, por unë kam dhënë përgjigje për pyetje këtu; dhe dua që ta kuptoni se unë po ju them të vërtetën nga zemra ime, përpara Krishtit, sipas dijes sime më të mirë. Shihni, janë të gjitha sisteme, dhe këto sisteme i kanë plagosur njerëzit. Disa shkojnë dhe bashkohen me metodistët, baptistët, presbiterianët, pentekostët, katolikët, dhe mendojnë se po i afrohen Perëndisë vetëm sepse kalojnë përmes një sistemi. Perëndia ndonjëherë e nderon këtë dhe ua largon sëmundjet përmes idhujve. Sepse pikërisht te hottentotët në Afrikë, ata marrin shërim përmes idhujve dhe të tjera gjëra të ngjashme, por mendojnë se po i afrohen Perëndisë. [7]

Unë thjesht çuditem me këta njerëz që i kam gjetur në shërbesa shërimi. Kam parë njerëz që kanë ardhur në platformë krejtësisht të verbër. Pasi është lutur për ta dhe janë shëruar, ata kanë lexuar Biblën dhe janë larguar duke lavdëruar Perëndinë. Por pas gjashtë muajsh i takon përsëri dhe janë sërish po aq të verbër sa në fillim.

Pse? Sepse shërimi hyjnor është aq i fortë sa është besimi yt dhe aq i qëndrueshëm sa është besimi yt.

Një predikues nga “Biznesmenët e Krishterë” ka qenë kohët e fundit këtu, ka dhënë dëshmi dhe ka treguar fotografi të njerëzve që janë shëruar nga kanceri dhe sëmundje vdekjeprurëse përmes shërimit hyjnor. Ata janë shëruar shumë, shumë vite më parë dhe ende e mbajnë këtë shërim. Janë lutur për ta para 14-15 vitesh dhe janë ende të shëndetshëm. Disa prej tyre kanë qenë në listën e vdekjes në klinikën e kancerit në Louisville dhe pritej të vdisnin atëherë, por janë ende gjallë dhe të shëndetshëm sa më s’ka.

Gjithçka varet nga vendi ku qëndron besimi yt. Shpëtimi yt është real, për aq kohë sa rrëfimi yt është i mirë. Por nëse rrëfimi yt lëkundet, atëherë shpëtimi yt humbet. Sepse Ai është Kryeprift, ulur në të djathtën e Perëndisë, që ndërmjetëson sipas rrëfimit tonë. Kjo është ajo që ndodh (Hebrenjve 4:14-16; Romakëve 10:8-10). [8]

Shërimi hyjnor, shenjtërimi dhe fuqia e Perëndisë zgjasin për aq kohë sa besimi yt qëndron. Kur besimi yt ndalon, atëherë edhe përvoja jote zhduket. Kjo është e bazuar në këtë mënyrë – thjesht mbi veprën e përfunduar të Krishtit në Golgotë. Ti je i shenjtëruar për aq kohë sa dëshmia jote është e drejtë, për aq kohë sa jeton një jetë të shenjtëruar dhe beson se Perëndia të ka shenjtëruar. Ti je i shenjtëruar dhe ia atribuon gjithçka hirit të Tij dhe meritës së Tij. Dhe për aq kohë sa ke pranuar shërimin dhe e beson shërimin tënd dhe qëndron në atë besim, do të jesh i shëruar për aq kohë sa e beson atë. Por nëse fillon të dyshosh...

Marrim një njeri që rri këtu dhe nuk është aspak i sëmurë, por le të fillojë në zemrën e tij të besojë se është i sëmurë. Ata do ta nxjerrin të sëmurë nga ndërtesa. Do të ndodhë sipas besimit tënd. Kjo nuk është shkencë e krishterë. Nuk dua të them se mendja ka pushtet mbi gjithçka. Por shihni, gjithçka varet nga atmosfera në të cilën jeton. (9)

A nuk është Ai i mrekullueshëm? Mendoni për këtë: Ne e themi kështu – çdo gjë i është dorëzuar Atij. “Nuk kam më mendimin tim. Nuk do të mendoj më siç kam menduar më parë, Zot. Do të mendoj ashtu siç mendon Ti. Dhe Ti ke premtuar se jam shëruar (Isaia 53:4-5); këtë do të mendoj. Unë dorëzoj mendjen time. Nuk do të mendoj më për sëmundjen time apo për vuajtjen që kisha. Nuk do të mendoj asgjë tjetër për këtë, përveç asaj që Ti ke thënë.”

Tani, përpara teje qëndron një person, ashtu siç ishe ti disa minuta më parë. Aty poshtë ishe i sëmurë, por një person i shëndetshëm qëndron aty. Jezusi Krisht po thërret atë person të shëndetshëm atje. Dhe ti, thjesht nëpërmjet besimit, ndërsa mbyll sytë, hyn në atë trup të shëndetshëm; atëherë vazhdo përpara dhe qëndro duke ecur në atë drejtim. (10)

E shihni? Është besimi yt; kurrë nuk janë ndjenjat e tua. Nuk ka rëndësi nëse është kështu apo nëse dora ime është e drejtë... kjo nuk ka asnjë lidhje. Është besimi im që vepron. Pikërisht përpara nesh shohim pamjen e një personi plotësisht të shëruar përmes besimit. Dhe pastaj ne bëjmë thjesht hap pas hapi, derisa të hysh drejt në atë person dhe vazhdo të ecësh në atë mënyrë.

Kështu ndodh. Besimi yt, jo ndjenjat e tua; besimi yt e sjell këtë gjë. Falënderim dhe lavdia i qoftë Perëndisë! [11]

Dhe unë them se nëse ne jemi të bindur ndaj rrugës së përgatitur nga Perëndia, lebra do të largohet, sëmundja do të largohet, çdo gjë do të largohet; por ne duhet të vijmë në rrugën e Tij për këtë ditë. Tani, zhytja në Jordan nuk do të ndihmojë më, ajo ishte për Naemanin. Ligji ishte për hebrejtë.

Hiri është përmes Krishtit.

[12]

Kur Perëndia thotë diçka, ajo duhet të ndodhë. Prandaj, nëse i plotëson kërkesat e Perëndisë, mbaje ne mend: Perëndia do ta shfaqë Vetën dhe do të kujdeset për çdo gjë tjetër. Thjesht ec përpara dhe shikoje si një vepër të përfunduar. Oh, a nuk është kjo e mrekullueshme? Oh, mendojeni vetëm! Thjesht thuaji Perëndisë! Perëndia tha: “Nëse ti e bën këtë, unë do të bëj atë.” Epo, nëse unë e bëj këtë, Ai duhet të bëjë atë.

Tani, djalli thotë: “Por Ai po vonohet.” Kjo nuk ka rëndësi fare. Danieli një herë u lut dhe kaluan 21 ditë para se engjëlli të vinte tek ai fare (Danieli 10:12-13); por ai nuk u dekurajua, sepse e dinte që Ai do të vinte sido që të ishte. Prandaj, ai vetëm priti derisa Ai të vinte. Kjo është e vërtetë. Oh, kjo është kur ti e merr besimin e vërtetë.

Por ne dëshirojmë të kemi një takim (shërbes) për shërimin e shpirtit, që brendësia të shërohet, sepse ajo është ajo që do të mbetet. Nëse ke jetën e përjetshme; jeta e përjetshme nuk shuhet dhe nuk plaket, ajo mbetet gjithmonë e njëjtë (Gjoni 5:24). [13]

Lëre Frymën e Shenjtë të vijë mbi çdo person që ka vërtet diçka brenda atje! Shërimi vjen nga brenda. Le të vijë ky shërim nga Fryma që është brenda teje (2 Korintasve 4:7). [14]

Dhe ne lutemi që Ti, ta bësh këtë kaq të vërtetë për secilin nga ne sot, që zemrat tona të digjen brenda nesh, shpirtat tanë të forcohen, trupat tanë të shërohen, mendja jonë të shërohet, shpirtat tanë të rinovohen

(2 Korintasve 5:17), të krijuar sipas mënyrës që Perëndia dëshiron të jemi. [15]

Ka një gjë për të cilën dua të jem i singertë me ty, miku im...

Mënyra se si Perëndia shëron është mbi bazën e shërbimit ndaj Tij. Shikoni, kjo ndodh mbi bazën e shërbimit ndaj Tij. Ne duhet ta pranojmë shërimin tonë mbi këtë themel: që do t'i shërbejmë Atij pasi të jemi shëruar.

Bibla thotë: “Rrëfeni njëri-tjetrit gabimet tuaja (Jakobi 5:16). Lutuni për njëri-tjetrin, që të shëroheni.” Shikoni, është mbi bazën se ju do t'i shërbeni Perëndisë. Shumë prej jush këtu ndoshta jeni në një gjendje të rëndë, pranë vdekjes. Dhe do të vdisni, nëse diçka nuk ndodh. Atëherë, dua që ju, në zemrat tuaja...

Ne mund t'ju lyejmë me vaj (Jakobi 5:14-15), mund të lutemi për ju, pastori juaj dhe unë mund të bëjmë lutjen e besimit, bëjmë gjithçka që mundemi. Por nuk do të ketë efekt, derisa ju vetë të hyni në bashkësi me Krishtin. E sheh? Duhet të hyni në atë bashkësi. (16)

Pavarësisht se për çfarë lloj shërbese bëhet fjalë, Fjala duhet të ketë përparësi. Ajo duhet të vijë gjithmonë e para. Shërimi i shpirtit vjen gjithmonë i pari. Sepse kur dikush lind përsëri nga Fryma e Perëndisë (Gjoni 3:3-5), ai ka jetë të pavdekshme, të përjetshme dhe nuk do të vdesë kurrë (Gjoni 5:24).

Por kur dikush shërohet në trupin e tij, kjo është vetëm për një kohë të kufizuar. Ndërsa shpëtimi i shpirtit është përjetë. Ai bëhet një krijesë e re në Krishtin (Galatasve 6:14-15), kur shërohet në shpirtin e tij. Shërimi hyjnor ishte tashmë i përfshirë në flijimin e pajtimit, por flijimi i ri i pajtimit është shumë më i mirë se ai i vjetri. Dhe edhe flijimi i vjetër përfshinte shërimin. Bibla thotë: “Ai u plagos për shkeljet tona; nepermjt plageve te Tija ne jemi shëruar.” E kaluara — u shëruam (Isaia 53:4-5). Oh, është e mrekullueshme! (17)

Ne e dimë se nuk shërojmë askënd vetë, por thjesht lutemi për ta. Unë kurrë nuk kam shëruar askënd vetë, por patjetër që kam parë shumë përgjigje të mrekullueshme ndaj lutjes, dhe kam parë Zotin duke i shëruar të sëmurët.

Por jo vetëm për shërimin e trupit, por edhe për shërimin e shpirtit, që është shumë më i rëndësishëm se shërimi fizik. Tani, është e mundur që nëse jeton mjaftueshëm gjatë, do të sëmuresh përsëri. Bibla thotë: “I drejti duhet të përballojë shumë sprova, por nga të gjitha e shpëton Zoti” (Psalmi 34:20). Pra, na janë premtuar shumë vuajtje, por gjithashtu edhe çlirimi prej tyre.

Në shërimin hyjnor, gjëja më e rëndësishme është shërimi hyjnor i shpirtit. Trupi i Krishtit ka nevojë për më shumë shërim se gjithçka tjetër që njoh – trupi i Krishtit. Ai është ndarë kaq shumë për shkak të teologjisë njerëzore dhe dallimeve konfesinale, sa është bërë një trup i sëmurë. Dhe unë po ju them, ai ka nevojë për shërim – për një shërim të madh. Prandaj, unë besoj se Zoti do të bëjë diçka të madhe për shërimin e pjesës së trupit të Tij që është këtu. [19]

Tani, Zot, unë lutem që Ti t'i shërosh ata – por për shërimin më të madh nga të gjitha! Nëse Ti i shëron trupat e tyre fizikë nga kanceri, tuberkulozi, pneumonia apo ndonjë sëmundje tjetër, ata pa dyshim do të sëmuren përsëri nëse jetojnë gjatë, sepse trupi i tyre është ende nën mëkatin, nën mallkimin. Por lejo që ata të marrin shërimin e vërtetë hyjnor – shërimin e shpirtit – i cili krijon një krijesë të re (2 Korintasve 5:17), që ka kaluar nga vdekja në jetë, dhe pastaj të presin në këtë tendë të vjetër (trupin) për shëlbimin e trupit (Romakëve 8:22-23), pasi shpirti është shpetuar. Jepi, o Zot! [20]

Kur të kemi arritur në fund të rrugës, nuk e dimë se ku dhe si do të sëmuremi. Ndoshta do të sëmuremi mendërisht. Mund të na kapë një ethe që tret apo djeg trurin tonë. Në fund të rrugës, mund të themi ose të bëjmë gjithçka të mundshme. Nuk e dimë. Por shihni, nëse jemi tashmë të ankoruar në Krishtin, atëherë nuk ka rëndësi se çfarë sëmundjeje na merr apo në çfarë gjendjeje jemi kur ikim. Gjithçka është përfunduar! Ne jemi të vulosur deri në ditën e shpengimit. Efesianëve 4:30 thotë: “Dhe mos e trishtoni Frymën e Shenjtë të Perëndisë, me të cilin jeni vulosur për ditën (jo të vdekjes suaj, por) të shpengimit tuaj.” Shihni, pasi të ketë kaluar vdekja, ti je ende i vulosur. [21]

Një mjek më tha: “Z. Branham, kam lexuar librat tuaj për shërimin. Pajtohem me ju dhe dua t'ju them se kemi raste të qarta, të cilat mund t'i provoj shkencërisht. Le të themi, një person ka një tumor malinj (te rrezkshëm), tuberkuloz, një ulcerë apo ndonjë gjë tjetër që është vërtet e rëndë... Ne e dimë që është vdekjeprurëse dhe ia themi atij. Kur ai atëherë prishet plotësisht, zhgënjehet, zemërohet dhe trazohet, atëherë ai pacient do të vdesë me te verte, e drejt.”

Por nëse ky pacient është një i Krishterë, zakonisht nuk i bën shumë përshtypje që do të vdesë. Kjo është thjesht një nga ato gjëra që duhet të ndodhin, sepse vdekja është një pjesë e jetës. Ai thjesht vazhdon përpara, e pranon dhe thotë: "Do të jetoj deri sa të më përfundojë koha." Një qëndrim i tillë pothuajse e zgjidh rastin. Ai do të vazhdojë të jetojë dhe të jetojë, përpara se vdekja ta marrë. [22]

Por ekziston një sëmundje më e madhe se sëmundja fizike. Dhe është shumë më e rëndësishme që të jemi të shëndetshëm për këtë ngjarje të madhe, e cila është gati të ndodhë... Është më mirë të jesh i përgatitur. Unë do të preferoja të isha një njeri i sëmurë, por i përgatitur me Zotin, sesa të isha një njeri i shëndetshëm dhe të mos isha i përgatitur për të shkuar me Zotin. Por sido që të jetë, Perendia është aq i gatshëm që ne të jemi si të shëndetshëm, ashtu edhe të përgatitur, në shpirt dhe në trup (1 Selanikasve 5:23-24). Sepse Ai na fal të gjitha padrejtësitë tona dhe shëron të gjitha sëmundjet tona. Ai vdiq për një qëllim të dyfishtë (Isaia 53:4-5). [23]

Burimi:

Shkëputur nga "Geistlicher Baustein Nr. 19 (2013)" – fjala e zbuluar për këtë orë, përpiluar nga Gerd Rodewald.

Fragmenti përmend gjithashtu mësimet të ndryshme nga predikimet e vëlla Branham-it.